

ԱՎԱՐԴ ՂԱԶԻՅԵԱՆ

1988թ. հայ ժողովրդի ազատագրական պայքարի ներկայ փուլի աստեղային տարին էր: Կարծես թե ոչ մի ուժ ի գորու չէր խարխլելու մեր միասնությունն ու համախմբուածութիւնը: Նոյնիսկ կործանարար երկրաշարժը մեզ չչեղեց մեր ուղուց:

Այսօր մեզնից շատերը տարակուսանք ու հիասթափութիւն են ապրում. վիճակագրութիւն ստոյգ չկայ, չեմ պնդում որ տոկոսը: Անկայն իմ խօսքը Ղարաբաղի խնդրին է վերաբերում, որը պէտք է, որ լինէր հիմա խնդիրների առանցքը:

1989թ. կեսերից շօշափելու աստիճան տեսանելի դարձաւ, որ շարժման ղեկավարների քաղաքականութիւնից Ղարաբաղը դուրս է մղում, թեւ 1989թ. Դեկտեմբերի 1ի որոշումը կայացաւ ժողովրդի ու շարժման ղեկավարների ճնշման ներքոյ: Հիմա արդէն պարզ է, որ որոշում ընդունել տալու հետապնդում էր իշխանութիւնը գրաւելու նպատակ, ինչպէս նաեւ «Նախիրիտ» գործարանի փակման վերաբերեալ որոշումը: Կենտրոնի վրայ այդ քայլերը ազդեցութիւն չգործեցին, թեւ ճկուն քաղաքականութիւն վարելու դէպքում կարելի էր այդ քայլերից օգուտ քաղել:

Նոր խորհրդարանը հերթով վերանայում է հնի որոշումները.

արդէն կասեցուել է «Նախիրիտ» գործարանի մասին որոշումը, այսօր-վաղը նոյնը կ'արուի եւ Ղարաբաղի վերաբերեալ: Այդպիսի թեթեւութեամբ ու դիւրութեամբ կասեցնելով մէկ-երկու տարի առաջ կայացուած որոշումները, անհրաժեշտ է մտածել դրանցից բխող բարոյական, առաջին հերթին՝ ազգավնաս հետեւանքների մասին: Մի՞թէ վերջին երկու-երեք տարուայ որոշումները չեն կայացուել այսօրուայ իշխող քաղաքական կազմակերպութեան ճնշմամբ, ժողովրդի անունից, ժողովրդի շահից ելնելով: Արդ, չե՞ն խարխլում այդ քայլերով մեր հատի հիմքերը...

Այսօր ժողովուրդը երկփեղկաւծ է. ըստ որում, գործի է դրուել նոյն եղանակը, ինչ կիրառում է կենտրոնը՝ մէկ ազգին միւսի դէմ հանելով: Մեզանում հայաստանցիներն են ոտքի ելել ղարաբաղցիների դէմ: Ղարաբաղի պաշտպանութիւնը ղարաբաղցիների գործն է, պնդում ու քարոզում են բոլոր մակարդակներով: «Մայրաքաղաք» ծրագրի թոթովախօս լրագրող-մեկնաբանը պահանջելու պէս առաջարկում է ղարաբաղցիների հանրահաւաքի ճառախօսին տեղափոխուել Ստեփանակերտ ու այնտեղ ճառել: Ղարաբաղցիների հետեւից կարմիր խնձոր չեն ուղարկել, ինչո՞ւ են եկել...Այդ երբ-

անի՞ց Հայաստան կոչուող այս փոքրիկ հողակտորը դարձաւ միայն հայաստանաբնակների հայրենիքը, ո՞ւմ արեան գնով ստեղծուեց Հայաստանի հանրապետութիւնը, որի անմիջական ժառանգորդներն են իրենց համարում այսօրուայ պետական գործիչները: Եւ եթէ անդրադառնալու լինենք այն ամօթալի ու ստոր հարցին, թէ որ հայը որտեղից է եկել, ո՞ր կը հասնենք:

Ղարաբաղի շուրջը լուծութիւն է տիրում: Պաշտօնական լրատուական միջոցները երբեմն-երբեմն մի-երկու նախադասութիւն են հրամցնում ժողովրդին: Նստացոյց է, հացադուլ, հանրահաւաքներ են լինում, քար լուծութիւն...Մինչդեռ Ղարաբաղում ամեն ժամ արիւն է հոսում: Թող Ղարաբաղն ինքն իրեն ինքնորոշուի: Յանուն Հայաստանի անկախութեան կարելի է զոհել եւ Ղարաբաղը: Միայն թէ դա չարաչար սխալմունք է. այսօր Ղարաբաղը, վաղը Զանգեզուրն ու Մեղրին, յաջո՞րդը...Եւ մի՞թէ ժողովուրդը տեղեակ է, թէ ի՞նչ է կատարում Գորիսում ու Կապանում, Մեղրիում ու Նոյեմբերեանում, ո՞ւմ է պատկանում Նիւվադին, ովքե՞ր են ապրում Ոսկեպարում...

Որտեղ որ ապրում է ղարաբաղցին, կռուի դաշտում թէ բեմահարթակում, գիտութեան կա-

ճառում, թէ պաշտօնական բարձր քուրդի վրայ, հանդէս է եկել իբրեւ հայ մարդ: Ոչ ոքի իրատունք չի տրուած օտարելու հայրենիքից, կտրելու մայր ժողովրդից: Գուցէ թէ դա բխո՞ւմ է աշխարհով մէկ թմբկահարուող մեր նորաթուխ ժողովրդավարութեան սկզբունքներից:

Իրաքանչիւր շարժում ունենում է իր մակընթացութեան ու տեղատուութեան փուլերը: Շարժման ղեկավարութիւնը կամովին յանձն առած անհատները պէտք է կարողանային հաշուարկել՝ օգտուելու ընձեռուած նուազագոյն հնարատրութիւնից՝ քայլ առ քայլ լուծելու համար հիմնական խընդիրը: Մինչդեռ նրանք մնացին հետեւողական ու հաստատակամ իրենց սխալների մէջ, առանց հաշուի առնելու ուժերի իրական յարաբերութիւնը:

Հարկաւոր է սթափուել, զօրաւիգ կանգնել Ղարաբաղին: Դրա համար անհրաժեշտ է համախմբել ազգի կարող ուժերին, առանց պիտակներ կպցնելու, անկախ քաղաքական, կուսակցական պատկանելիութիւնից, մշակել ճկուն ու ընդունելի քաղաքականութիւն, այլապէս մենք կանգնած ենք պառակտման վտանգի առաջ: